



# Bájkkeavijssa NuorttaSálto

## Máske skávlá bissu – jus áhpadiddjiit oadtju

Tæksta/gáva:  
Maria Mikkelsen

- Máná soaptsu dána skávláv vádtset, ja skávlá dagi de bájkke ávdan sjaddá, javllá Astrid Johnsen.  
(Arkivfoto Muskenelever 2008)

- Dát la huj buorre, ja ájnas Másskáj ja Máske sebrudahkaj, javlla Astrid Johnsen, Máske skávlá æjgátjuohkusin.

Mánnodagá mierredij Divtasvuona suohkanstivrra Máske skávláv bisodit. 5 jienastij vuosstáj guorrasin 11 sadjásajbáhkkojádédiddje Jan Ivar Jakobsenis oajjvadásájn. Dájna li Máskega riek dudálettja.

- Máná soaptsu dána skávláv vádtset, ja skávlá dagi de bájkke ávdan sjaddá, javllá Astrid Johnsen.

### Li rahtjam

Ávdutjis lij ávdánammadus mierredam Máske skávláv hiejtet. Mette Seljenesa ja Elbjorg Mathiesena dalloj oajjvadijga skávláv hiejtet áhpaduslága 9a milta, ja dat oajjvadás guokta jienastij vuosstáj mierreduváj. Dat rájes li skávláoaahppe æjgáda rahtjam skávláv bisodittjat, vaj skávlá niellja oahppe ettjin galga dárbahtit Ájluoktaj mannat skávláv váttstájt.

- Dahkam lip majt lip ájmmudam, ja gájka viehkenævojt adnám. Lip girjev tjállám ja tjielggim man ájnas Máske skávlá le mánájda ja dajda gánna dáppe árru, subtsas Astrid Johnsen.

### Ælla nuoges diedo

Ja æjgáda vuorbástuvvin dajna gá suohkanstivrra ittjij hiejttemij guorrasa.

- Muv mielas ep diede jus juohkka oahppijn la buorep dille Ájluovtan, ælla miján nuoges diedo dan birra, javllá Jan Ivar Jakobsen, gut suohkanstivrratjáhkkanimen oajjvadij Máske skávláv bissot.

Suv mielas lej gássjelis ássje, ja sán dádjat manen muhtema ettjin sujna guorrasa.

- Dáv ássjev lip álles jagev árvustallam dan diehti gá skávlán li nav gallegasj oahppe. Dádjadav iektjádij argumentajt, le hálvva gássjelisvuolta gá oahppe e klássabirrusav oattjo. Valla iesj gájt mierrediv gæhttjalit skávláv bisodit, javllá Jakobsen.

### Vuojnov rievdej

Báhkkojádédiddje, Anders Sæter, guorrasij Seljenesa ja Mathiesena oajjvadásáj ávdánammadusán, valla suohkanstivrran sán farra Jakobsena oajjvadásájn guorrasij.

*Manen la vuojnov rievddam?*



- Dát la dábálasj prosæssa juohkusin, ja ávdánammadusá mærrádus le agev gasskabáddásasj. Gullunagi le sidot dahkat nav buorev gá máhttelis skávláv bisodittjat, javllá Sæter, gut loabet galggi dahkat majt nahki áhpadiddjiit gávnatjij.

### Dárbahi áhpadiddjiit

Danen gá suohkanstivrra mærrádusán li aj gájbbádusá. Máske skávlá bissu - jus gávnnu áhpadiddje máhtudagájn. Dálle almoduvvi guokta rabás virgge skávlán.

- Sávidahtte áhtsi áhpadiddje buorre

máhtudagájn. Jus i, de skávlá hiejtduvvá mærrádusá baktu, javlla Jan Ivar Jakobsen.

Ávdála li læhkám gássjelisvuoda áhpadiddjiit Másskáj gávnat. Dálven skávlá vargga hiejtduvváj jur dan diehti gá ællim áhpadiddje. Dalloj hæhttjuga guokta pensjonista, Mikal Urheim ja Willy Ámo, skávlájage gæhtjáj áhpadit. Æjgát Astrid Johnsen ij huomana måráda.

- Állu jasska lav. Jáhkáv skávlá l dána tjaktjaj, javlla Astrid Johnsen.



## Vájmulasj dájddavuosádus

- «Muv vájmmo» le vuosádus mij tsahkkat ja arvusmahtá muv, javllá Katarina Rimpi ietjas dájddavuosádusá birra.

Mánnodagá rabáj Katarina Rimpi ietjas vuosádusáv «Muv vájmmo» Árrana dávvervuorkkán.

Rimpi l sáme dájddár ja duodjár Álloluovtas, Jáhkámáhen Svierigabielén. Sán buoremusát lijkku muorraj ja tjárvij barggat, valla málli aj akryllajjn ja akvarellajjn.

- Dá bargo li munji vaddám sjivnnjedimávov ja sieloráfev. Sáme kultuvrajn ja tuvsánjahkásasj árbedábij vuodon, luonndovirkkáj vattá praktikkalasj dájmvav ja hámev, dát le ihkeva suohtas! Javllá Rimpi ietjas dájda birra. Árranin subtsastij gáktu dájdaajn barggádij.

- Mán lav agev giedaj barggam. Valla gá mán bajássjaddiv ij lim dajna árvvo.

Láhkiv farra matematihkav ja realfágajt skávlán, ja maKenagi aj sivilingeniöraraj láhkágáhtiv. Valla dat ij lim riekta munji, jáhtiv sijddaj ja láhkágáhtiv tjoarve- ja tekstijllalinjáv Sámi Áhpadusguovdátjijn Jáhkámáhen. Danna mán dádjadiv duoijjn sihtiv barggat, javllá Katarina Rimpi, gut tjaktjaj dájddaáhpadasaj álggá.

Katarina Rimpi le aj juojgge, ja le dájtt bievjij CD:ajn barggamin. Árranin juojgaj dajda gudi lidjinn rahpamusasj boahám.

- Juohkka bále gá áda sadjáj boadáv juojgav áhko *vuggesang*, dat jaskadahtá muv.

Dájddavuosádus le Árranin bárggemáno rádjáj.